

(Im Anschluß an die Lesung und vor dem Halleluja zum Evangelium):

Leev Lück he in dä Kirch und doheim am Monitor,
wat wor dat für e Johr?

Normal däten mir jetzt Fasteloovend un Valentinsdaach fiere,
mit Funke, Schunkele, Knutsche un och e paar Biere.

Do jingen mir och schön kostümiert op ene Maskenball,
dä hann mr jetzt ald fast e ganz Johr üvverall.

Ob Schnüsslappe oder FFP 2,
dat wor bis jetzt einerlei.

Leever dä Lappe ovven an dr Schnüss,
als dä Zeddel vom Krematorium ungen an dr Föß.

Jetzt mösse mr och in dä Kirch OP-Maske aanhann un dürfen uns dobei net jeniere.
Am Altar kummen ich mir für, als dät ich dä Herrjott operiere.

Dä ein oder andere widd dodrövver verrückt
Un dobei sinn mir eijentlich all ganz jän jet jeck.

Do künnt mr mit dä „Bläck Fööß“ singe: „*Wie sull dat nur wigger jonn?*“
Ich hann do en Idee, un die hät mit däm Evangelium von hück jett zo donn.
Mir bejrößen dat Evangelium immer mit enem „Hallo Julia“,
nä, Quatsch, ich wor in dä verkiehrte Abteilung, dat heiß „Halle-luja“.

Leev Lück, sid mir net kott,
üvversetzt heiß dat ganz einfach „Lobt Gott“.

Mir dürfen dat jetzt zwar net singe,
mir sinn ävver och dofür bekannt, dat mir für alles ene Usswäch finge.

Use Tastenhengst, dä N.N. widd uns jetzt e Halleluja spille,
op dat mir och schunkele künne.

Herr Kapellmeister schmieß dä Reeme dropp,
un Lück, die in enem Huus wunne, dürfen och schunkele mit Stipfefott

Sidd esu joht un doht dobei mit:

Halleluja + Evangelium

Leev Lück,
do han mir jerad jehüürt, wie do su ene Ussätzije zom Jesus kom und säät: „*Wenn du willst, kannst du machen, dass ich rein werde*“.

Dat kann mr jetz sehn wie mr will, un ich mein et och net als Beschwerde.

Ävver dat süht es su us, als ob dä jet äälere Jung
sich vürdrängele dät, wie jetz och e paar bei der Coronaschutz-Impfung.

Dä Jesu kannt jo noch net die Coronaschutzverordnung
un dat dä dämm dann jeholefe hät, dat kohm von ener janz andere Ordnung.

Mir hann die hück vielleicht verjesse,
weil mir sin vom Wirtschaftswachstum besesse.

Schneller, hühter, wigger un immer noch mieh,
do säht uns su e klein Virus: dat jeit nit mieh.

Wat die Welt och koss,
mir lötschen se gnadenlos uss.

Mir verjessen dobei,
und su manchem Trumpel-dier ist dat einerlei:

Däm Herrjott sing Welt is uns nur jelieht,
domit se och uus Pänz noch dient.

Wenn dä Jesus jetz im Evangelium dä ärme Kärl jesund määt,
dann zeigt der uns domit worüm et hügg och jeeht.

Bedde un op e Wunder waade,
dat nötz jar nix, dat sagen uns vom RKI die Zahle.

Ömdenke, net nur an sich denke und sich doröm anders verhahle,
nur dat kann senke die Zahle.

Un dat net nur dann, wenn mir hann en Pandemie,
nä – och dann, wenn mir lösting singe „*Annemie, ich kann net mieh*“.

Joot – dat senkt zwar net däm Wieler vom RKI sing Inzidenzwerte,
ävver mr kann dann och im eijene Portemonnaie merke.

Jetzt zoröck zum Evangelium.

Dä Jesus hät da ärme Deuvel jesond jemaat,

un imm jesaat, dat hä net üvveral dodrövvver schwaat.

Do hät dä KääL sich natürllich net dran jehaale,
sundern verzällt dat vür allem dä Ahle.

Die luurten jo immer dodropp, ob dä Jesus sich dät och an die Jesetze vom Moses
dät haale.

Dat hät dä Jesus och janz jewief jedonn
Un do kunnt dä jesund jemaate Jung och jonn.

Hä hät imm jesaat,
bring däm Pastuur en Prommetaart.

Jot – dat wor jez domols e bisje anders, leev Lück,
ävver ich moss et jo üvversetze für hück.

Alsu, wenn dat hück noch ens passiere dät,
dann fänd ich Prommetaart als Reinigungsoffer net schläch.

Ich maach jo süns keine Kooche,
ävver üvver Prommetaart dät ich net flooche.

Dä Witz dobei is, dat dä Jesus die Ahle üvver et Uuhr jehaue hät,
indämm er dä arme Käärl heile dät.

Wer domols nämlich Aussatz hät jehat un in zerrissene Lumpe un unjewäschene
Hoor leef üvver de Stroß,
dä jalt als vom Herrjott direk bestrof.

Do kunnt und durf keiner jet maache,
weil dat wor nur däm Herrjott sing Saache.
Un do joov et och für keine jet zo laache.

Wenn dä Jesus jez dä KääL jesond määt,
dann määt er domit och klar, dat er dat dürfe däät.

Er is nämlich däm Herrjott singe Filius,
un määt jez mit däm janze Driss von Schuld un Sühne Schluss.

Dat hät er sich och jet koste losse,
und hät sing Levve am Krüz beschlosse.

Däm Duud hät hä domit jesaat – un dat is dat Neue –
„Du kanns mir ens dä Naache deue“.

Ob iih et jläuvt oder nit, leev Lück,
dat dä Jesus sich für uns hinjeovve hät, is für uus e Jlück.

Fasteloovend dürfen mir net fiere,
ävver am Valtentinsdaach dürfen mir et mol studiere und vielleicht och probiere,
- mir hann jo süns nix zo donn, bei all dä Vire.

Un wer mit singem Minsch in einem Haushalt wunnt,
dä bliev dobei och noch jesund

sich enander hinzujevve,
dat jitt Leve.

Joot – manchmal kütt dat bei dä Jüngere jet unjeläje,
ävver su is halt et Leve.

Die Äalere (alsu mir vom Knubbel) können dat Hinjevve unjeschötz waage,
weil – do is suunsu nix mieh zo erwaade.

Alles an Beziehunge und Kontakte via „Zoom“,
do sinn mir mol nächs Johr jespant op dä „Babyboom“.

Un dann freu ich mich jetz ald leever üvver dat Jeschrei von dä Pänz,
als üvver mingem Grav all die Kränz.

Leev Lück – passt joot op üch op,
Dann danzen mir im nächste Johr och widder Stipfefott.

Amen.